

Jisas bin meigim blain men luk

Storimen: Bambang na wen Jisas en im wekinmen olabat bin wokwok, deibin luk wan men hubin jidan blainwan brom beibitaim.

² Wal detlot wekinmen bin askim Jisas,

Wekinmen: “Titja, hubin dumbat nogudbala ting blanga meigim det men abum det trabul? Det men gin o im mami en dedi?”

Jisas: “Nobodi bin dum nogudbala ting blanga meigim im jidan blainwan. Nomo. God bin meigim im jidan blainwan, dumaji im wandim ebribodi garra luk im pawa wek langa det blain men.

⁴ “Yu si? Wen mi jidan iya langa dijan kantri garram yumob, im jis laik deitaim wen pipul oldei dumbat wek, en wi garra dumbat ol detlot wek blanga God hubin jandim mi, dumaji det taim garra kaman weya im garra go dakbala, en nobodi kaan dum det wek blanga God.

⁵ “Yumob sabi? Wen mi iya langa dijan kantri, mi na det lait blanga ola pipul langa dijan kantri.”

Storimen: Lagijat na Jisas bin tok langa im wekinmen olabat.*

⁶ Afta na Jisas bin tjakam spit langa graun, en imbin meigim mad garram det spit, en imbin rabum det mad langa det dubala ai blanga det blain men, ⁷en imbin dalim det blain men,

Jisas: “Yu go en washim miselp langa det wodahol gulum Sailowam.”

Storimen: Wal det neim blanga det wodahol im tok Jandim. En Jisas bin jandim det blain men deya na, en det blain men bin go langa det wodahol, en imbin washim miselp, en streidawei imbin luk, en imbin kambek langa im kemp gudwan na.